




Klub poslanika Naša stranka - Nezavisni blok

Broj:
Sarajevo, 28.09.2021. godine

PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM
n/r g. Denis Zvizdić, predsjedavajući



Na osnovu člana 8. Poslovnika Predstavničkog doma Parlamentarne skupštine Bosne i Hercegovine ("Službeni glasnik Bosne i Hercegovine" 79/14, 81/15, 97/15, 78/19 i 26/20) upućujem sljedeću:

POSLANIČKU INICIJATIVU

kojom se nalaže Ministarstvu civilnih poslova BiH da, u roku od 14 dana od dana usvajanja ove Inicijative, uspostavi postupak i otpočne proces izdavanja jedinstvenih COVID-19 certifikata sa QR kodom s ciljem njihovog korištenja van Bosne i Hercegovine na jedan od iduća dva načina:

1. Izdavanje takvih certifikata od strane samog ministarstva, na osnovu potvrda o vakcinisanju/prebolovanom COVID-u koje ministarstvo pribavi od nadležnih entitetskih, kantonalnih i organa Brčko Distrikta, odnosno koje potvrde navedenih nadležnih organa građani sami dostave ministarstvu, ili
2. Kreiranje i dostavljanje navedenim nadležnim organima jedinstvenog obrasca za izdavanje takvih certifikata od strane tih organa.

OBRAZLOŽENJE

Ovom inicijativom traži se uspostava jedinstvenih COVID-19 certifikata sa QR kodom, s ciljem isključivog korištenja tih certifikata od strane građana Bosne i Hercegovine u inostranstvu. Uzimajući u obzir entitetsku, odnosno kantonalnu i nadležnost Brčko Distrikta nad većinom pitanja koja se tiču zdravstvene zaštite i administracije, u Bosni i Hercegovine potvrde o vakcinisanju i prebolovanom COVID-u trenutno izdaje najmanje dvanaest različitih organa. Potvrde, stoga, nisu uniformne, te se građani BiH suočavaju sa brojnim teškoćama prilikom ulaska u strane države (konkretni problemi su prijavljeni u slučaju Češke Republike, Ujedinjenog Kraljevstva i drugih), odnosno izlažu nepotrebnim troškovima testiranja.

Ministarstvo civilnih poslova BiH, prema članu 15. Zakona o ministarstvima i drugim organima uprave BiH, ima jasnu nadležnost za "usklađivanja planova entitetskih tijela vlasti i definisanje strategije na međunarodnom planu" u području, između ostalog, zdravstva. S obzirom da bi se QR certifikati izdavali isključivo za potrebe njihovog korištenja van granica Bosne i Hercegovine, odnosno na međunarodnom nivou, te da bi bili izdavani isključivo na osnovu već postojećih potvrda izdanih od strane nadležnih entitetskih, kantonalnih i organa Brčko Distrikta, MCP BiH bi postupanjem po ovoj Inicijativi u potpunosti ostao u okviru svojih nadležnosti, bez obzira na koju se od navedenih opcija odluči.

Rezultat koji se traži ovom Inicijativom se može – ilustracije, ne suštine, radi – uporediti sa sistemom Zelene, odnosno Bijele, karte za potrebe dokazivanja posjedovanja obaveznog auto osiguranja u inostranstvu. Ti dokumenti su uniformni, ali se koriste isključivo u inostranstvu, te se izdaju isključivo na osnovu posjedovanja auto osiguranja izdatog od strane osiguravajućih kuća čiji je rad primarno regulisan entitetskim propisima.

S poštovanjem,

Damir Arnaut

Poslanik u Predstavničkom domu

Trg BiH 1, 71000 Sarajevo; tel: +387 (0) 33 284 413